



INTRODUCZIUN

DAD ANDRI CASANOVA

«Dieus ha buca fatg la mort» (Sab 1,13), aschia ha ei num el cudisch dalla sabientscha. Gie, el vul buca che nus meien sutsu, el vul buca quei che stinschenta nus. Igl profund esser dalla scaffiziun ei numnadamein la veta. Dieus ha dau a nus la veta, ed el vul che nus vivien la veta.

Viver la veta munta cheu d'adina encurir la sabientscha. Pertgei lezza munta veta era sur la mort ora. En ella po quei sem dil salit ch'ei mess en mintga creatira, entscheiver a catschar e purtar fretg.

Pli tard el cudisch dalla sabientscha ha ei num: L'entschatta dalla sabientscha munta formaziun, formaziun munta carezia, carezia munta da suandar ils camondaments, e gliez garantescha nunsvaneivladad, e nunsvaneivladad fa ch'ins ei damaneivel da Diu (cf. Sab 6,17–19).

1. LECZIUN

Sab 1,13–15; 2,23–24

Dieus ha buca fatg la mort,
 el selegra buca sch'ils vivents van sutsu.
 Tut ha el creau per ch'ei possi subsister;
 las creatiras da quest mund ein saluteivlas,
 denter ellas dat ei buc in tissi nuscheivel,
 e sin tiara ha il Hades° negina pussonza.
 La justia ei gie immortala.

◦ il reginavel dalla mort

Dieus ha scaffiu il carstgaun per la nuncorrumpeivladad°
 e fatg ch'el ei la semeglia da siu agen esser.
 Entras la scuidonza dil giavel° ei la mort vegnida el mund,
 e quels che appartegnan a lez, ein suttaposts ad ella.

◦ nunsvaneivladad

◦ tenor il grec «diabolos» quel che fiera tut in denter l'auter